



**Sud Bosne i Hercegovine**  
**Sud Bosne i Hecegovine**

---

**Broj: S1 3 Iž 037943 20 Iž**  
**Sarajevo, 22.10.2020. godine**

Sud Bosne i Hercegovine, u vijeću Apelacionog odijeljenja sastavljenom od sudija Dinke Bešlagić-Čovrk kao predsjednika vijeća, Srete Crnjak i Vesne Trifunović kao članova vijeća, odlučujući o žalbi Milice Lukić, Međuselje bb, Višegrad, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020.godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020.godine, u nejavnoj sjednici, održanoj dana 22.10.2020.godine, donio je

**R J E Š E N J E**

**Žalba se odbija.**

**O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žaliteljicu odbijen je upis iz razloga što je adresa iz njene prijava, adresa sa koje je podnesena prijava za umrlu osobu.

Žaliteljica je protiv navedene odluke blagovremeno izjavila žalbu u kojoj navodi da ispunjava sve uslove propisane Izbornim zakonom BiH za glasanje van BiH, moli da joj se to i odobri.

Centralna izborna komisija Bosne i Hercegovine u odgovoru na žalbu predlaže da se žalba odbaci kao nedopuštena, odnosno da se odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja pobijane odluke, provjerom i uvidom u službene evidencije, utvrdila da je Centralnoj izbornoj komisiji BiH dostavljena prijava za umrlu osobu Radmilu Pejović za koju je

evidentirana promjena o smrti dana 10.08.2020. godine. U navedenoj fiktivnoj prijavi u obrascu prijave za upis birača u CBS za glasanje izvan BiH-PRP 1, u rubrici „Adresa boravka van BiH na koju će biti upućen glasački materijal“ pod tačkom 1. kao primatelj pošiljke je naveden Dragana Vukotić, a adresa privremenog boravka Vuka Karadžića 48/1, Lajkovac, R Srbija.

Centralna izborna komisija BiH je prilikom razmatranja prijave Milice Lukić utvrdila da je prijava na kojoj je za žaliteljicu navedena adresa privremenog boravka Vuka Karadžića 48/1, Lajkovac, R Srbija adresa na koju treba da se uputi glasački materijal ista adresa kao i dostavljena fiktivna prijava za umrlu Radmilu Pejović. Stoga je pravilno odbijena prijava žaliteljice u cilju spriječavanja zloupotrebe u izbornom procesu i činjenice da je adresa privremenog boravka, odnosno adresa na koju treba uputiti glasački materijal, ista i za osobu za koju je utvrđeno da je umrla.

Napomene radi, žaliteljici nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer ista može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA  
S U D I J A**

**Dinka Bešlagić-Čovrk**